

Minister Michelle Winklaar riba dia internacional di boluntarismo

Bo bida ta mehora dor di haci trabou boluntario

Varios organisacionnan no gubernamental hunto cu Nacionnan Uni a marca e dia 5 di December como e dia pa celebra "Dia Internacional di Boluntario". E dia aki tin un nificacion special pa mundo henter pasobra hopi iniciativanan ta bini for di boluntarionan cu, den nan tempo liber y sin ricibi pago, ta haci algo util pa nan comunidad. "Mi ta orguyoso di por bisa cu aki na Aruba hopi di nos organisacionnan, specialmente den aspectonan social y cultural, ta conta cu e sosten incondicional di boluntarionan. Mi tin hasta durf di bisa cu sin nan apoyo, hopi proyecto y iniciativanan lo no a mira luz di dia", asina Michelle Winklaar, Minister di Asuntonan Economico, Asuntonan Social y di Cultura a bisa relaciona cu celebracion di e dia special aki.

Dia internacional di boluntarionan ta sirbi pa organisacion di boluntario y e boluntarionan



individual por demostra nan contribucionnan, tanto na nivel local como na nivel internacional. Esaki tur como parti di e logronan cu Nacionnan Uni a stipula den su "Millennium Developments Goals". A celebra e dia aki pa prome bes na aña 1985 y despues di esey tur aña tin paradanen, proyectonan boluntario, chekeonan medico gratis y asina por sigui menciona un lista di forma con e dia aki ta ser celebra den diferente

pais rond mundo. Ta bon pa menciona cu otro aña ta aña internacional di boluntarismo y como tal lo tin diferente actividad y informacion relaciona cu boluntarismo na Aruba.

Boluntarismo riba su mes ta algo esencial pa nos comunidad. Den sentido cu boluntarismo tin un efecto positivo y duradero riba cualkier comunidad. Un boluntario basicamente ta duna bek, bo-

luntarismo ta un bon manera pa gradici pa cosnan bon den bo bida. E ta permiti bo conecta cu hende, boluntarismo ta un bon manera pa haci conoci cu otro y hasta cera amistadnan nobo. E ta crea speransa, den sentido cu un hende den un momento dificil di su bida lo haya speransa ora nan sa cu tin hende cu ta cla pa duna di nan tempo. Y finalmente, e ta bon pa bo salud pasobra hendenan cu ta haci trabou boluntario ta

sinti mas sano, fisicamente y psicologicamente tambe.

Na Aruba por pensa riba organisacionnan manera Rode Kruis y cantidad di fundacionnan cu ta traha den diferente area, tur ta conta cu boluntarionan cu ta duna tur loke ta den nan alcance pa por yuda otro nan. Separa di fundacionnan, nos isla conoce un lista largo di organisacionnan, manera ta Aruba Lions Club, Kiwanis Club, Womens Club, Meals on Wheels y asina lo por sigui pasa dor di e lista di gruponan den nos comunidad cu a base boluntario ta yudando. Tambe nos conoce esunnan cu un specialisacion, manera FAVI y FEPO den cual boluntarionan ta yuda esunnan cu problema di bista y oido. Laga nos no lubida riba hendenan manera Maybeline Arends-Croes, cu pa mas o menos 40 aña largo ta duna les di canto den forma boluntario na nos muchanan.

"Bida ta siña nos duna mas di loke nos ta spera bek. Mas hende cuminsa duna un tiki di nan tempo y conocimiento na otro nan, anto hunto nos lo logra mas. Mi ta felicita tur boluntario riba e dia special aki y laga nan sa cu Gobierno y pueblo henter ta hopi orguyoso di nan. Sin boso esfuerso y dedicacion incondicional, hopi logro grandi na bienestar di nos tur riba e pida baranca aki lo no a keda realisa", asina Minister Michelle Winklaar a conclui.